

**Tuluit oqaasii allamiut oqaasiini sallahsatut atuutsinneqariartornissaannut, aammalu
danskita oqaasii atuartitsinermini oqaatsitut pinngitsooranilu atuartitsissutissatut
atorunnaarsinneqariartornissaannut Naalakkersuisut iliuusissanik
pilersaarusiornissamut peqquneqarnissaannik Inatsisartut aalajangiiffigisassaattut
siunnersuut**

Inatsisartunut ilaasortaq Jens Nap̃tôK', Naleraq

pillugu

Siunnersuutip aappassaaneerpeqarneranut

**Kultureqarnermut, Ilinniartitaanermut Ilisimatusarnermut Ilageeqarnermullu
Ataatsimiititaliap**

ISUMALIUTISSIISUTAA

Kultureqarnermut, Ilinniartitaanermut Ilisimatusarnermut Ilageeqarnermullu Ataatsimiititaliap
suliarinninnermini ukuninnga inuttaqarpoq:

Inatsisartunut ilaasortaq Nivi Heilmann Efraimsen, Inuit Ataqtigii, siulittaasoq
Inatsisartunut ilaasortaq Isak Johannessen, Naleraq, siulittaasup tullia
Inatsisartunut ilaasortaq Margrethe Th̃rup Andersen, Demokraatit
Inatsisartunut ilaasortaq Pipaluk Olsen, Demokraatit
Inatsisartunut ilaasortaq Anders Olsen, Siumut

UKA 2025-imi ulloq 22. oktober siullermeerinninnerup kingorna ataatsimiititaliap siunnersuut
misissorpaa.

Siunnersuutip imarisaa siunertaalu

Tuluit oqaasii allamiut oqaasiini sallahsatut meeqqat atuarfiini atuutsinneqariartornissaannut,
aammalu danskita oqaasii atuartitsinermini oqaatsitut pinngitsooranilu atuartitsissutissatut
atorunnaarsinneqariartornissaannut Naalakkersuisut iliuusissanik pilersaarusiornissamut
peqquneqarnissaannik siunnersuut siunertaqarpoq.

Danskita oqaasii atuartitsinermini oqaatsitut inatsimmi piumasaqaataajunnaarnissaat
pinngitsooranilu atuartitsissutissatut atorunnaarsinneqarnissaat siunnersuummi ataatsimut

isigalugu siunertaavoq, kiisalu qulakkeerniarneqarluni tuluit oqaasiisa atuarfinni allamiut oqaasiini sallertut atuutsinneqalernissaat.

Siunnersuutip Inatsisartuni siullermeerneqarnera

Siunnersuutip siullermeerneqarnerani siunnersuutip imarisai soqutigineqarluput, Naalakkersuisullu allannguutissatut siunnersuutaat isumaqataaffigineqarlupuni. Kalaallit oqaasiisa pigiinnarnissaata sallinneqartarnissaatalu pingaaruteqassusaa partiinit tamanit oqaatigineqarpoq. Tamatuma saniatigut nunarsuarmioqataajartorneq sukkasuumik ineriartortoq oqaatigineqarpoq, aammalu assersuutigalugu inuit naapittarfiinik atuineq ulluinnarni oqaatsinut atorneqartartunut malunnaatilimmik sunneeqataasoq. Ullutsinni meerartagut inuusuttortagullu tuluttut oqaatsinik atuineruleralluttuinnarnerat ilutigisaanillu danskit oqaasiinut soqutiginninneq annikilliartortoq partiinit amerlanerusunit oqaatigineqarpoq.

Nunarsuarmioqataalernissamut kissaateqarneq pillugu ataatsimut isigalugu isumaqatigiittoqarpoq, taamaattumillu meeqqat atuarfiini tuluit oqaasiinik ilinniartitsisarnerup nukittorsarneqarnissaanut soqutiginnittoqarluni. Tamatuma saniatigut danskisut oqaatsit allamiut oqaasiinik ilinniartitsissutigineqartarneri toqqagassat pingajorilissagaat partiit ataasiakkaat oqaatigaat, tassa imaappoq meeqqat atuarfiini fagi qinigassatut inissillugu. Immikkoortup suliarineqarnerata nalaani ilutigisaanik oqaatigineqarpoq Naalakkersuisut iliuusissatut pilersaarummik suliaqarnerannut atatillugu innuttaasunik soqutigisaqatigiinnillu attuumassutilinnik akuutitsinissaq pingaaruteqartoq.

Meeqqat atuarfiini kalaallit oqaasiinik atuartitsisarnerup nukittorsarneqarnissaa kiisalu tuluit oqaasiinik annertunerusumik ilinniartitsisoqalersinnagu tunngaviusussat pisariaqartut pilersinneqaaqqaassat Naalakkersuisunit kissaatigineqarpoq. Tamanna tunngavigalugu immikkoortup siullermeerneqarneranut atatillugu Naalakkersuisut ima allannguutissatut siunnersuummik saqqummiussippot:

”Kalaallit oqaasiisa inissisimanerisa atugaanerisalu nukittorsarneqarnissaat attatiinnarneqarnissaallu siunertaralugit meeqqat atuarfianni kalaallit tuluillu oqaasiisa nukittorsarneqarnissaannut Naalakkersuisut iliuusissatut pilersaarusiornissaannut peqquneqarnissaannik Inatsisartut aalajangiiffigisassaattut siunnersuut. Iliuusissatut pilersaarut kingusinnerpaamik UPA2027-imi saqqummersinneqareersimassaaq.”

Inuit Ataqtigiit, Siumut aamma Atassut siullermeerinninnermi Naalakkersuisut allannguutissatut siunnersuutaannik tapersiippot, ilutigisaanik Naleraq aalajangiiffigisassatut siunnersuummut ilusimisut iluseqartillugu tapersiisut. Partiit tamarmiullutik immikkoortoq ataatsimiititaliamut suliassanngortippaat.

Allakkatigut apeqqutit

Ataatsimiititaliap siunnersuummik suliarinninnissaminut atatillugu apeqqutit assigiinngitsut akissuteqarfigeqqullugit Ilinniartitaanermut, Kultureqarnermut, Timersornermut Ilageeqarnermullu Naalakkersuisoq qinnuigaa. Ataatsimiititaliap apeqqutaasa assilineri aammalu Ilinniartitaanermut, Kultureqarnermut, Timersornermut Ilageeqarnermullu Naalakkersuisup akissutaata assilineri isumaliutissiisummut matumunnga ilanngussatut kakkiunneqarput.

Siunnersuutit aningaasatigut kingunerisassai

Inatsisartut suleriaasianni § 33, imm. 1, allaqqavoq siunnersuut tunngavilersugaassasoq siunnersuutillu aningaasatigut allaffissornikkullu kingunerisinnaasai allaaserineqarsimassasut. Siunnersuut A/C fuldmægtigip ukiup affaata ingerlanerani sulinissaa 250.000. kr-inik naleqassasoq naatsorsuutigineqartoq siunnersuuteqartup allassimagaa ataatsimiititaliamit maluginiarneqarpoq.

Taamatuttaaq ataatsimiititaliamit maluginiarneqarpoq Naalakkersuisut ataatsimiititaliap allakkatigut apeqquteqaataanut akissutiminni oqaatigigaat iliuusissatut pilersaarummik suliaqarnissaq allaffissornikkut sinaakkutit pioreersut iluanni sapinngisamik suliarineqarnissaa naatsorsuutigineqartoq.

Ataatsimiititaliap siunnersuummut oqaaseqaatai

Immikkoortup suliarineqarnerata nalaani kalaallisut oqaatsit piginnarnissaat sallinneqartarnissaallu pillugit tunngaviummik isumaqatigiittoqartoq ataatsimiititaliamit paasineqarpoq. Taamatuttaaq meeqqat atuarfiini kalaallit tuluilu oqaasiinik ilinniartitsisarnerup nukittorsarneqarnissaa pillugu sulinissaq ilutigisaanillu danskisut ilinniartitsisarnerup ingerlaannarnissaa isumaqatigiiffiuvoq. Tassunga atatillugu ataatsimiititaliap maluginiarpaa ikaarsartoqarnissaa paasissutissiiffiulluartumik toqqammaveqarluni ingerlanissaa pingaarutilittut oqaatigineqartoq, taamaattumik Naalakkersuisut iliuusissatut pilersaarummik suliaqarnissaat isumaqataaffigineqarluarpoq.

Taamatuttaaq Naalakkersuisut iliuusissatut pilersaarummik suliaqarnissaannut atatillugu soqutigisaqatigiit attuumassutillit akuutinneqarnissaat pingaarutilittut taakkartorneqartoq ataatsimiititaliamit maluginiarneqarpoq. Tamatuma saniatigut ataatsimiititaliap maluginiarpaa meeqqat atuarfianni kalaallit oqaasiinik atuartsineq malunnaatilimmik nukittorsarneqaaqqaassasoq, aammalu tuluit oqaasiinik annertunerusumik ilinniartitsisoqalersinnagu tunngaviusussat pisariaqartut pilersinneqaaqqaassasut Oqaasileriffiup inassutigisimagaa Naalakkersuisunit innersuussutigineqartoq.

Innuttaasut ilinniakkatigut qaffasissumik arlalinnik oqaaseqarsinnaanissaannut periarfissiisumik aqqiisummi Naalakkersuisut suliaqarniartut pitsaasutut ataatsimiititaliamit

nalilernerqarpoq. Taamaattorli ataatsimiititaliamit erseqqissaavigineqartariaqartutut isigineqarpoq atuartut innuttaasullu kalaallisut, danskisut tuluttullu piginnaasanik ilinniakkatigut qaffasissumik angusaqarsinnaanissaat ullumikkut periarfissaareertariaqaraluartoq, oqaatsimmi taakkua ilinniartitsissutaasarmata. Taamaattumik meeqqat atuarfiini atuartitsisarnerit misissorneqarnissaat suliamut attuumassuteqarsinnaapput, tassunga ilanngullugu atuartitsinissamut piumasaqaatit atuuttut naapertuiffigineqarnerisa qulakkeerneqarnissaat kiisalu unammillernarsinnaasut suussusersillugillu sumiiffissineqarnissaat.

Matumani tunngaviusut naapertorlugit atuartitsisarnermi danskisut fagip inissisimanerata allannguiffigineqaratarsinnaanera pillugu naalakkersuinikkut oqallittoqarnissaanik assingusumilluunniit iliuuseqartoqarnissaanik periarfissarsiorlutik Naalakkersuisut sulissuteqarnissaat ataatsimiititaliamit ilutigisaanik pingaaruteqartutut isigineqarpoq, tassami – soorlu ataatsimiititaliap allakkatigut apeqquaqataanut Naalakkersuisut akissutaanni allaqqasoq – naggataatigut tamanna naalakkersuinikkut apeqqutaalertussaammat.

Ataatsimiititaliap inassuteqaatai

- Ataatsimiititaliap isumaqatigiittup Naalakkersuisut allannguutissatut siunnersuutaat akuerineqassasoq inassutigaa.

Qulaani allassimasut assigalugit Naalakkersuisut iliuusissatut pilersaarummik suliaqarnerminnut atatillugu soqutigisaqaqatigiit suliamut attuumassutillit sapinngisaq naapertorlugu akuutinneqarnissaat ataatsimiititaliamit Naalakkersuisunut kaammattuutigineqassaaq.

Taama oqaaseqarluni isumaliutissiisummilu allassimasunut paasinnilluni ataatsimiititaliap siunnersuut aappassaaniigassanngortippaa.

Nivi Heilmann Efraimsen
Siulittaasoq

Isak Johannessen
Siulittaasup tullia

Margrethe Thårup Andersen

Pipaluk Olsen

Anders Olsen

Ilanngussat:

Ilanngussaq 1: UKA 2025/161 pillugu ataatsimiititaliap allakkatigut apeqquteqaataanut Naalakkersuisunit akissutit.